

Date – 10/07/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

AKASHVANI AIZAWL

1. Chawl lova ruah a la sur reng avangin state chhung hmun thenkhata leimin leh tuilian vanga harsatna tawh te tanpui a chhawmdawl hna thawh mek a ni.
2. Mizotaxi App a vantlang phur chi lirthei in ziaklut te chu vawiin atangin thla 1 chhung tlan lohni nei lovin an tlan tan.
3. Prime Minister Narendra Modia chuan vawiin khan ni hnih cham turin New Zealand Khawpui Auckland a thleng.
4. Union Petroleum and Natural Gas Minister Hardeep Singh Puri chuan ethanol pawlh tuialhthei E85 fuel hman tum anih thu a sawi.

<><><>

RAIN HAVOC

Chawl lova ruah a la sur reng avangin leimin leh tuilian vanga harsatna tawh te tanpui a chhawmdawl hna thawh mek a ni a,

Lungleia kan corr sawi danin, Tlabung tuipui chu a lian chho zel a, tun dinhmun report kan dawn chinah Tlabung khuaah chhungkaw 42, Nunsury khuaah chhungkaw 7, Tiperaghat ah chhungkua 45, Malsury-ah chhungkaw 5 an vaiin chhungkaw 90 atanga 100 vel chu hmun him lamah suan chhuah an ni tawh a ni.

VC

Tlabung dinhmun hi a danglam reng a, thingtlang khaw thenkhat tlawhpawh theih loh engemawzah a awm bawh avangin, fur ruahsur hi eng anga nasain nge an tawrh chiah hriat theih a ni lo a.

Hetihlai hian, hmun him lam a suanchhuah te hi Shelter House leh YMA Hall ah te an bungrua dahsak an ni a, anmahni pawh riak thei tur a tih nimahse a tam zawk chuan chhung te belin anmahni an in buaipui ve mek bawh. Tlabungah hian SDO(C) Pu Moses Lalfakawma hovin sorkar mi te leh NGO ten tanpui hna an thawh mek a ni.

Hetihlai hian Bualte dai a leimin erawh Dist.thu eitu leh Contractor ten an vil reng nachungin thenfai hleihtheih a la ni lo. Ruah a la tla reng a, mikhual tangkhang an la thahnem a, YMA lamin eitur leh riahna an ruahman sak a, mimal ang a tanpuina pawh an pe ve mek reng a ni.

Veng leh khua hrang hrangah leimin te nau a awm ve mek a, YMA Branch hrang hrang te pawhin chhiatna a thlenin YMA hruaitu te hrilh hre vat turin Hriattirna an chhuak ve mek bawk a ni.

Indian Meteorological Department (IMD) Aizawl chuan ni 2 lo la awm tur chhung chu ruah a sur chhonzawm dawn niin a hmulawk a, tun dinhmunah Aizawl, Saiha, Lawngtlai leh Lunglei ah te a tla tam bik a ni.

Ruahsur avanga chhiatna hrang hrang thleng thei laka fimkhur turin IMD Aizawl Director Pu Sudheer Kumar chuan mipuite a chah a, lirthei khalhtute leh mipuite chu leimin tamna hmun a fimkhur tur leh State Disaster Management Authority in thu a pek te zawm turin a chah a ni.

<><><>

MIZO TAXI APP

Mizorama vantlang phur chi lirthei a chuang thin te'n sorkar approved rate diktak an chawi theihna tura duan Mizotaxi App chu vawiin atanga August ni 10 thleng tlan lohni nei lovin an tlan tan.

Akashvani News in Department hotute hnen atanga thudawn danin, tun dinhmun ah Mizo Taxi App a in register tawh 849 an awm tawh a. Heng zingah hian 4 - Wheeler Taxi in register 231, 2 - Wheeler Taxi 603 leh Autorickshaw 15 in register tawh an awm a. Document clear loh vanga registration pawm loh 134 an awm a ni.

Kan corr report lo ngaithla ang.

Mizotaxi App hnuaia inziahlul theih hun hmasa chu July ni 1 khan tihtawp lailawk a ni a. Inziahlul theih hun chhunga inziaklut ve hmanlo te atangin inziah luh hun hawng leh tura ngenna a awm avang leh document clear loh avanga online dilna pending, hun tiam chhunga clear hman lo te an awm avangin vawiin khan Mizotaxi App hnuaia inziahlul hun chu July ni 31 thleng hawn belh leh a ni. Hun hawn belh chhung hian Aizawl khawpui chhunga 2 - Wheeler Taxi, 4 – Wheeler Taxi leh Autorickshaw te chu in register theih a ni a. Registration hi Mizotaxi Office, Chaltlang ah emaw online kaltlangin tih theih a ni a, lirthei document update lo chu register theih a ni dawnlo niin thuneitute chuan an sawi a ni.

<><><>

AAP

Aam Admi Party(AAP) chuan sorkar in tun hnaia damlo zu mamawh tana RED CARD siam phalna tura kum tin cheng 5000 chawi ngai a tih chu tha an tih lo thu sawiin, cheng 5000 sen ngai lo in damlo te sorkar in free se an tih thu an sawi.

(BYTE)

Vawiin khan Aizawl Press Club-ah thuthar thehdarh tute kawmin AAP Vice President Lalhmangaiha Pachuau MUHCS kalpui mek chu tha an tih thu an sawi a, amaherawhchu inziah luh hunbi awm tohlo se an ti a ti a, Mizoram Sorkar hmasate'n an la lak ngai loh kawng siamthatna/enkawlna (Road Cess) leh khawtlang hmasawlna ruhrel siamna (Social infrastructure cess) tur chhiah, petrol leh diesel-ah litre 1 a cheng 4 September 2024 atanga chawi char char hmangin Mizoram pum

kawng siamtha se, khawtlang hmasawwna ruhrel hi a takin mipui hnen thleng se an ti a, he sum lut leh chhuahna hi mipui hnenah langtlang takin puanzar tur in Sorkar an phut tlat tih an sawi bawk a ni

AAP chuan inthlan hmaa ZPM leader, tuna Chief Minister ni ta in ZPM Chief Minister in porfolio a neive dawn lo tih a sawi hnua, tuna Portfolio 7 lai a chang leh ta mai chu mipui te bumna a nih thu sawiin, Chief Minister chu a thusawi angin awm se an tih thu an sawi a. Special Intensive Revision ah Chakma tamna khua 23 laia voter zaa 100 pung chu dan dik taka pung nge dan dik lo a pung tih hi Sorkar in enfiah nghal se an ti.

<><><>

MPCC

Congress Party PAC Member, MLA hlui Pu TT Zothansanga chuan, Restricted Tender ti ve lo tura Manifesto a dahtu ZPM sorkar chuan Chief Minister kaltlangin Restricted Tender cheng vbc 46,36 nuai 98 sing 5 & 7,130 an pe tawh a ti.

He thu hi vawiin-a an party Political Session ah sawiin Pu TT Zothansanga chuan Restricted Tender inpek hi MNF-in an rawn uar hle a, tuna sawrkar thara Chief Minister hian Restricted tender chu Kalphung Thar ZPM sorkar hnuaiah hriat a nih tawh loh tur thute a sawi a, an sorkar hnu kar lovah Consultancy Firm 328 an Empanelled nghal a, Chief Minister kal tlang chauhva Restricted Tender leh Departmental hna thawk turin Order te a chhuak ta a. SASCI sum cheng Vbc. 629 leh nuai 17 leh Consultancy Firm 328 cheng vbc 957 leh nuai 17 Blanket Approval-chu CM chuan a pe vat a ti a, hei hi Mizoram Contract hnaa World Record a ni a ti.

Tun sorkarah hian Sorkar Department 14 zirchian a nih thu sawiin Restricted Tender a hna inpek hi Cheng Vbc Sang 46,36 Nuai 98 Sing 5 & 7,130 pe tawh in ,Departmental a hna inpek - Rs. Vbc 9,10 Nuai 64 Sing 75,461 a ni a, a vai belhkhawmin Cheng Vbc Sang 55,47 Nuai 63 Sing 32,591 hu man hna hi an lo pe tawh a tih a tarlang a, Sasci sum pawh Vbc Sang 5503 Nuai 31 puk tawhin heng te hi Restricted tender hnathawh nan hman zel a nih rin a ni a ti.

Pu TT Zothansanga chuan, Restricted Tender pek dan tarlangin, PWD ah pe hnem berin cheng Vbc Sang 40,47 Nuai 73 Sing 70293 pek a ni a ti a. P&E in dawt in Cheng vbc 120 nuai 38 sing58,000 a pe a, Education ah cheng vbc 120 nuai 30, Tourism ah cheng Vbc 170 nuai 90 sing 42,000 leh UD & PA ah cheng vbc834 nuai 130 sang 4,011 pek a ni tawh a ti. Restricted Tender-ah hian Mizote thawh theih ve tur, hnam dang hna pek a awm teuh a ti bawk a, Hna 16 zinga 8 chu awlsam taka Mizo ten an thawh theih pangngai a ni a ti.

Pu TT Zothansanga chuan Foreign Contribution Regulation Act (FCRA) siamtha tura Parliament in hma a lakna turah mipuite tanho a tul a ti a, a pawimawh berah chuan sorkar, issue base a central sorkar pui tur MP ten FCRA amendment ah hian BJP thlawp lo tur leh, do zawnga vote thlak ngei turin hma la se a ti a, hei hi Kohhranho tawngtaina hlawhtlinna hmuh theih langsar tak tur a ni ang, a ti.

<><><>

FLOWER SHOW

Pangpar Zuar Association buatsaihin Aijal Club Park (City Park)-ah Flower show cum Fair neih mek a ni.

Flower show cum Fair hi Thawhlejni atang khan neih tan niin naktuk thleng neih a ni dawn a. Pangpar chi hrang hrang, thlai chi leh lei tha zuar seat 147 an in pho a ni.

Akashvani Aizawl zawhna chhangin Pangpar Zuar Association Secretary Jacob Lalrinawma chuan tun dinhmun ah member 400 chuang aizawl leh aizawl pawn atang an awm mek thu sawiin, pangpar zuar association te chu pangpar zuara eizawng leh chhungkaw chawm te an nih hlawm thu a sawi.

Pangpar zuar Association Secretary chuan fur ruahtui tlak lai anih avangin tum dang angin an in hralh that loh thu a sawi a, naktuk bik erawh fair tawp ni a nih angin pangpar leh thlai ah te sale an kalpui dawn a, mi zawng zawng fair lo chhim turin an sawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM MODI IN AUSTRALIA

Prime Minister Narendra Modia chuan vawiin khan ni hnih cham turin New Zealand Khawpui Auckland a thleng. Ram pathum tlawha zinchhuak PM Modia hian Indonesia leh Australia-ah te hlawhtling taka hun a hman hnuin vawiin khan New Zealand a thleng a. A cham chhungin New Zealand Prime Minister Chirstopher Luxon nen an inkawm dawn a. Ram pahnih inlaichinna te zau takin an sawi dun dawn a. Abik takin sumdawna, leh ralthuam lam an thlurbing ang. Tun tum hi kum 40 hnua India Prime Minister New Zealand a tlawh leh hmasak ber a ni a. Pu Modia hian sumdawng hotute leh infiammi langsar tak tak te a kawm dawn bawk a ni.

<><><>

E85

Union Petroleum and Natural Gas Minister Hardeep Singh Puri chuan ethanol pawlh tuialhthei E85 fuel hman tum anih thu a sawi. Pu Puri-a sawidanin E85 hi tuna tuialhthei hmanlai E20 fuel aiin litre-ah cheng 20 in a tlawm zawk dawn a. E85 tuialhthei hi a hman danah khuahkhirhna khauh tak siam tur niin a hmang thei tur lirthei bikte chauh hman tura tih a ni dawn a ti bawk. He hmalakna hian mipuite sum sen tihblem kawngah nasa takin a chhawk an beisei a ti bawk.

<><><>

FIFA

FIFA World Cup 2026 quarterfinal inkhelah zanin zanlai dar 12.30 ah Spain leh Belgium an intum dawn a. He inkhela chak zawk zawk hian Semifinal ah France

an tum dawn a ni. Puan tawh angina nizan khan chuan 2-0 in Morocco hnehin semifinal an lut a. France tan hian Kylian Mbappe leh Ousman Dembelle ten goal an thun a ni.

<><><>